

曹子建集

曹

曹子建集卷第七

皇子生頌

魏陳思王曹

植撰

於聖我后憲章前志克纂二皇三靈昭事祇
肅郊廟明德敬忌潛和積石鍾天之釐嘉月
令辰篤生聖嗣慶由一人萬國作嘉喁喁萬
國岌岌群生稟命我后綏之則榮長爲臣職
終天之經仁聖奕代永載明明同年上帝休
祥淑禎藩臣作頌光流德聲吁嗟卿士祇承



予聽

玄俗頌

玄俗妙識飢餌神穎在陰脩游即陽無景道
遙北嶽凌霄引領揮霧昊天含神自靜

母儀頌

殷湯令妃有莘之女仁教內脩度義以處清
謚后宮九嬪有序伊爲媵臣遂作元輔

明賢頌

於鑠姜后光配周宣非禮不動非禮不言晏

起失朝永巷告愆王用勤攻萬國以虔

孔子廟頌

脩復舊廟豐其薨宇莘莘學徒爰居爰處王
教旣備群小遄沮魯道以興永作憲矩洪聲
登遐神祇來祐休徵雜沓瑞我邦家內光區
域外被荒遐

學官頌

自五帝典絕三皇禮廢應期命世齊賢等聖
者莫高於孔子也故有若曰出乎類拔乎萃

誠所謂性與天道不可得而聞矣
由也務學名在前志宰予晝寢糞土作誠過
庭子弟詩禮明記歌以詠言文以騁志予今
不述后賢曷識於鑠尼父生民之傑性與天
成該聖備藝德倫三五配皇作烈玄鏡獨鑑
神明昭晰仁塞宇宙志凌雲霓學者三千莫
不俊又唯仁是憑惟道足恃鑽仰彌高請益
不已

社頌

於惟太社官名后土是曰勾龍功著上古德
配帝王寔爲靈主克明播植農正曰社尊以
作稷豐年是與義與社同方神北宇建國承
家莫不攸叙

宜男花頌

草號宜男旣擘且貞其貞伊何惟乾之嘉其
擘伊何綠葉丹花光采晃曜配彼朝日君子
耽樂好和琴瑟固作螽斯惟立孔臧福濟大
姒永世克昌

冬至獻襪頌

玉趾既御履和蹈貞行與祿邁動以祥并南
闕北戶西巡王城翱翔萬域聖體浮輕

庖犧贊

木德風姓八卦創焉龍瑞官名法地象天庖
厨祭祀網罟魚畋琴瑟以像時神通玄

女媧贊

古之國君造簧作笙禮物未就軒轅纂成或
云二皇人首蛇形神化七十何德之靈

神農贊

少典之胤火德成木造爲耒耜導民播穀正
爲雅琴以暢風俗

黃帝贊

少典之孫神明聖哲土德承火赤帝是滅服
牛乘馬衣裳是制雲氏名官功冠五帝

少昊贊

祖自軒轅青陽之裔金德承土儀鳳帝世官
鳥號名殊職別系農正扈氏各有品制

顓頊贊

昌意之子祖有軒轅始誅九黎水德統天以國為號風化神宣威暢八極靡不祗虔

帝嚳贊

祖自軒轅玄囂之裔生言其名才德帝世撫寧天地神聖靈察教弭四海明並日月

帝堯贊

大德統位父則高辛克平共工萬國同塵調適陰陽其惠如春巍巍成功配天則神

帝舜贊

顓頊之族重瞳神聖克協頑瞽應唐涖政除凶舉俊以齊七政應曆受禪顯天之命

夏禹贊

吁嗟天子極世濟民克卑宮室致孝鬼神蔬食薄服黻冕乃新厥德不回其誠可親疊疊其德温温其人尼稱無間何德之純

殷湯贊

殷湯代夏諸侯振仰放桀鳴條南面以王桑

林之禱災灾克償伊尹佐治可謂賢相
湯禱桑林贊

惟殷之世炎旱七年湯禱桑林祈福于天翦
髮離爪自以爲牲皇靈感應時雨以零

周文王贊

於赫聖德寔惟文王三分有二猶服事商化
加虞芮傍暨四方王業克昭武嗣遂光

周武王贊

桓桓武王繼世滅殷咸任尚父且作商臣功

冒四海救世濟民天下宗周萬國是賓

周公贊

武王即位年尚幼稚周公居攝四海慕利罰
叛柔服祥應仍至誦長反政達夫忠義

周成王贊

成王繼武賢聖保傳年雖幼稚岐嶷有素初
疑周公終焉克寤旦奭佐治遂致刑錯

漢高帝贊

屯雲斬蛇靈毋告祥朱旗旣抗九野披攘禽

嬰克羽掃滅英雄承機帝世功著武湯

漢文帝贊

孝文即位愛物儉身驕吳撫越匈奴和親納
諫赦罪以德讓民殆至刑錯萬國化淳

漢武帝贊

世宗光光文武是攘威振百蠻恢拓土疆簡
定律曆辯脩舊章封天禪土功越百王

漢景帝贊

景帝明德繼文之則肅清王室克滅七國省

役薄賦百姓殷昌風移俗易齊美成康

姜嫄簡狄贊

嚳有四妃子皆爲王帝摯且崩堯承天綱玄
鳥大跡殷周美祥稷契旣生翊化虞唐

禹妻贊

禹妻塗山土功是急惟啓之生過門不入矯
達明義勲庸是執成長望嗣大祿以襲

斑婕妤贊

有德有言寔惟斑婕盈冲其驕窮悅其厭在

漢夷貞在晉正接臨颶端幹衝霜振葉

吹雲贊

天地變化是生神物吹雲吐潤浮雲翳鬱

赤雀賦贊

西伯積德天命攸顧赤雀銜書爰集昌戶瑞
為天使和氣所致嗟爾後王昌期而至

巢父贊

堯禪許由巢父是耻穢其溷聽臨河洗耳池
主是讓以水為濁嗟此三士清足厲俗

務光贊

湯將伐桀謀於卜子既聞讓位隨以為耻薄
於殷世著自汙已自投潁水清風邈矣

商山四皓贊

嗟爾四皓避秦隱形劉項之爭養志弗營不
應朝聘保節全貞應命太子漢嗣以寧

三鼎贊

鼎質之精古之神器黃帝是鑄以像太上能
輕能重知凶識吉世衰則隱世和則出

承露盤銘

并序

明帝鑄承露盤莖長十二丈本圍上盤逕四尺下盤逕五尺銅龍達其根龍身長一丈背負兩子自立於上林園甘露乃降使臣爲頌銘銘曰

岿岿承露峻極太清神君礪魄洪基嶽停下
潛醴泉上受雲英和氣四充翔風所經匪我
明君孰能經營近歷纏度三光朗明殊俗歸
義祥瑞混并鸞鳳晨棲甘露宵零神物攸協

高而不傾奉天戴巍恭統神器固若露盤長
存永貴賢聖繼跡奕世明德不忝先功保茲
皇極垂作億兆永荷天秩

寶刀銘

造茲寶刀旣礪旣礪匪以尚武予身是衛麟
角是觸鸞距匪蹶

曹子建集卷第七

曹子建集卷第八

魏陳思王曹

植撰

改封陳王謝恩章

臣既弊陋守國無効自分出削以彰衆誠不
意天恩滂霈潤澤橫流猥蒙加封茅土既優
爵賞必重非臣虛淺所宜奉受非臣灰身所
能報答

封二子為公謝恩章

詔書封臣息男苗為高陽鄉公志為穆鄉公

臣伏自惟文無升堂廟勝之功武無摧鋒接刃之効天時運幸得生貴門遇以親戚少荷光寵竊位列侯榮曜當世顧影慙形流汗反側洪恩罔極雲雨增加旣榮本榦枝葉并蒙苗志小豎旣頑且稚猥荷列爵並佩金紫施崇所加惠及父子

初封安鄉侯表

臣抱罪即道憂惶恐怖不知刑罪當所限齊陛下哀愍臣身不聽有司所執待之過厚即

日於延津受安鄉侯印綬奉詔之日且懼且悲懼于不脩始違憲法悲於不慎速此貶退上增陛下垂念下遺太后見憂臣自知罪深責重受恩無量精魄飛散忘軀殞命云

謝妻改封表

璽書今以東阿王妃爲陳王妃并下印綬因故上前所假印以其拜授書以即日到臣輒奉詔其才質伍下謬同受私遇寵素餐臣爲其首陛下體乾坤育物之德東海含容之大

乃復隨例顯封大國光揚章灼非臣負薪之
才所宜克當穢釁所宜蒙獲夙夜憂歎念報
罔極洪施遂隆旣榮枝幹猥復正臣妃爲陳
妃光耀宣朗非妾婦蠢愚所當蒙被葵藿草
物猶感恩養况臣含氣銜珮弘惠歿而後已
誠非翰墨屢辭所能

自試表

臣聞士之美永生者非徒以甘食麗服宰割
萬物而已將有以補益群生尊主惠民使功

存於竹帛名光於後嗣今臣文不昭於俎豆
武不習於干戈而竊位藩王施祿東夏消損
天日無益聖朝淮南尚有山竄之賊吳會猶
有潛江之虜使戰士未獲歸於農畝五兵未
得收於武庫蓋論者不耻謝善戰者之羞去
夫凌雲者泥蟠者也後申者先屈者也是以
神龍以爲德尺蠖以求申昔湯事葛文王事
大夷固仁者能以大事小若陛下明哲之使
繼能陸賈之蹤者使之江南發愷悌之詔張

日月之信開以降路權必奉承聖化斯不疑也

求自試表二首

臣植言臣聞士之生世入則事父出則事君事父尚於榮親事君貴於興國故慈父不能愛無益之子仁君不能畜無用之臣夫論德而授官者成功之君也量能而受爵者畢命之臣也故君無虛授臣無虛受虛授謂之謬舉虛受謂之尸祿詩之素餐所由作也昔二

虢不辭兩國之任其德厚也且萌不讓燕魯之封其功大也今臣蒙國重恩三世于今矣正值陛下升平之際沐浴聖澤潛潤德教可謂厚幸矣而位竊東藩爵在上列身被輕煖口厭百味目極華靡耳倦絲竹者爵重祿厚之所致也退念古之受爵祿者有異于此皆以功勤濟國輔主惠民今臣無德可述無功可紀若此終年無益國朝將挂風人彼已之譏是以上慙玄冕俯愧朱紱方今天下一統

九州晏如顧西尚有違命之蜀東有不臣之
吳使邊境未得稅甲謀士未得高枕者誠欲
混同宇內以致太和也故啓滅有扈而夏功
昭成克商奄而周德著今陛下以聖明統世
將欲卒文武之功繼成康之隆簡良授能以
方叔召虎之臣鎮衛四境爲國爪牙者可謂
當矣然而高鳥未挂於輕繳淵魚未懸於鈞
餌者恐鈞射之術或未盡也昔耿弇不俟光
武亟擊張步言不以賊遺於君父也故車右

伏劔於明轂雍門刎首於齊境若此二子豈
惡生而尚死哉誠忿其慢主而凌君也夫君
之寵臣欲以除患興利臣之事君必殺身靜
亂以功報主也昔賈誼弱冠求試屬國請係
單于之頸而制其命終軍以妙年使越欲得
長纓占其王羈致北闕此二臣者豈好爲夸
主而曜世俗哉志或鬱結欲逞其才力輸能
於明君也昔漢武爲霍去病治第辭曰匈奴
未滅臣無以家爲夫憂國忘家捐軀濟難忠

臣之志也今臣居外非不厚也而寢不安席
食不遑味者以二方未尅爲念伏見先帝武
臣宿兵年耆即世者有聞矣雖賢不乏世宿
將舊卒由習戰也竊不自量志在授命庶立
毛髮之功以報所受之恩若使陛下出不世
之詔效臣錐刀之用使得西屬大將軍當一
校之隊若東屬大司馬統偏師之任必乘危
蹈險騁舟奮驪突刃觸鋒爲士卒先雖未能
擒權馘亮庶將虜其雄率殲其醜類必效須

臾之捷以滅終身之愧使名掛史筆事列朝
榮雖身分蜀境首懸吳闕猶生之年也如微
才弗試沒世無聞徒榮其軀而豐其體生無
益於事死無損於數虛荷上位而忝重祿禽
息鳥視終於白首此徒圜牢之養物非臣之
所志也流聞東軍失備師徒小衄輟食忘餐
奮袂攘袵撫劔東顧而心已馳於吳會矣臣
昔從先武皇帝南極赤岸東臨滄海西望玉
門北出玄塞伏見所以行師用兵之勢可謂

神妙也故兵者不可豫言臨難而制變者也
志欲自効於明時立功於聖世每覽史籍觀
古忠臣義士出一朝之命以徇國家之身難
雖屠裂而功勳著於景鍾名稱垂於竹帛未
嘗不撫心而歎息也臣聞明主使臣不廢有
罪故奔北敗軍之將用而秦魯以成其功絕
纓盜馬之臣赦而楚趙以濟其難臣竊感先
帝早崩威王棄世臣獨何人以堪長久常恐
先朝露填溝壑墳土未乾而身名並滅臣聞

騏驥長鳴伯樂昭其能盧狗悲號韓國知其
才是以効之齊楚之路以逞千里之任試之
狡兔之捷以驗搏噬之用今臣志狗馬之微
功竊自惟度終無伯樂韓國之舉是以於悒
而竊自痛者也夫臨博而企竦聞樂而竊抃
者或有賞音而識道也昔毛遂趙之陪隸猶
假錐囊之喻以寤主立功何況巍巍大魏多
士之朝而無慷慨死難之臣乎夫自銜自媒
者士女之醜行也干時求進者道家之明忌

也而臣敢陳聞於陛下者誠與國分形同氣
憂患共之者也冀以塵霧之微補益山海燧
燭末光增輝日月是以敢冒其醜而獻其忠
必知爲朝士所笑聖主不以人廢言伏惟陛
下少垂神聽臣則幸矣

又

五帝之世非皆智三季之末非皆愚用與不
用知與不知也夫相者文德昭者也將者武
功烈者也文德昭則可以匡國朝叙百揆稷

契夔龍是矣武功烈則可以征不庭廣邦境
南仲方叔是也昔伊尹之爲媵臣至賤也呂
尚之處漁釣至陋也及其見舉湯文誠合志
同豈復假近習之薦因左右之介哉發騏驥
於吳越可謂困矣及其伯樂相之孫子遇之
形體不勞而坐取千里伯樂善御馬明君善
御臣誠任賢使能之明效也昔段干木脩德
於閭閻秦師爲之輟攻而文侯以安穰苴授
節於邦境燕晉爲之退師而景公無患皆簡

德尊賢之所致也願陛下垂高宗傅崑之明以顯中興之功

謝賜柰表

即夕殿中虎賁宣詔賜臣等冬柰一奩柰以夏熟今則冬生物以非時爲珍恩施以口爲厚非臣等所宜荷之

諫伐遼東表

臣伏以遼東負阻之國勢便形固帶以遼海今輕車遠攻師疲力屈彼有其備所謂以逸

待勞以飽待飢者也以臣觀之誠未易攻也若國家攻之而必克屠襄平之城懸公孫之首得其地不足以償中國之費虜其民不足以補三軍之失是我所獲不如所喪也若其不拔曠日持久暴師於野然天時不測水濕無常彼我之兵連於城下進則有高城深池無所施其功退則有歸途不通道路纖好東有待釁之吳西有伺隙之蜀吳越東南荆揚騷動蜀應西境則雍涼三分兵不解於外民

罷困于內促耕不解其飢疾蠶不救其寒夫
渴而後穿井飢而後殖種可以圖遠難以應
卒也臣以爲當今之務在於省徭役薄賦斂
勤農桑三者既備然後令伊管之臣得施其
術孫吳之將得奮其力若此則太平之基可
立而待康哉之歌可坐而聞曾何憂於二敵
何懼於公孫乎今不息邦畿之內而勞神於
蠻貊之域竊爲陛下不取也

獻璧表

臣聞玉不隱瑕臣不隱情伏知所進非和氏
之璞萬國之幣璧爲充貢

獻文帝馬表

臣於先武皇帝世得大宛紫驃一疋形法應
圖善持頭尾教令習拜今輒已能又能行與
鼓節相應謹以表奉獻

上牛表

臣聞物以洪珍細亦或貴故不見僬僥之微
不知泱泱之泰不見果下之乘不別龍馬之

大高下相懸所以致觀也謹奉牛一頭不足
追遵大小之制形少有殊敢不獻上

謝鼓吹表

許以簫管之樂榮以田游之嬉陛下仁重有
虞恩過周旦濟世安宗寔在聖德

求通親親表

臣植言臣聞天稱其高者以無不覆地稱其
廣者以無不載日月稱其明者以無不照江
海稱其大者以無不容故孔子曰大哉堯之

爲君惟天爲大惟堯則之夫天德於萬物可
謂弘廣矣蓋堯之爲教先親後疎自近及遠
其傳曰克明峻德以親九族九族旣睦平章
百姓及周之文王亦崇厥化其詩曰刑于寡
妻至于兄弟以御于家邦是以雍雍穆穆風
人詠之昔周公弔管蔡之不咸廣封懿親以
藩屏王室傳曰周之宗盟異姓爲後誠骨肉
之恩爽而不離親親之義寔在敦固未有義
而後其君仁而遺其親者也伏惟陛下資帝

唐欽明之德體文王翼翼之仁惠洽椒房恩
昭九親群臣百僚番休遞上執政不廢於公
朝下情得展於私室親理之路通慶弔之情
展誠可謂恕已治人推惠施恩者矣至於臣
者人道絕緒禁錮明時臣切自傷也不敢乃
望交氣類脩人事叙人倫近且婚媾不通兄
弟永絕吉凶之問塞慶弔之禮廢恩紀之違
甚於路人隔闕之異殊於胡越今臣以一切
之制永無朝覲之望至於注心皇極結情紫

闕神明知之矣然天實爲之謂之何哉退省
諸王常有戚戚具爾之心願陛下沛然垂詔
使諸國慶問匪節得展以叙骨肉之歡恩全
怡怡之篤義恕妻之家膏沐之遺歲得再通
齊義於貴宗等惠於百司如此則古人之所
歎風雅之所詠復存於聖世矣臣伏自惟省
無錐刀之用及觀陛下之所拔授若以臣爲
異姓竊自料度不後於朝士矣若得辭遠遊
戴武弁解朱組佩青紱駙馬奉車趣得一號

安宅京室執鞭珥筆出從華蓋入侍輦轂承
荅聖問拾遺左右乃臣丹情之至願不離於
夢想者也遠慕鹿鳴君臣之宴中詠棠棣匪
他之誠下思伐木友生之義終懷蓼莪罔極
之哀每四節之會塊然獨處左右唯僕隸所
對唯妻子高談無所與陳發義無所與展未
嘗不聞樂而拊心臨觴而歎息也臣伏以爲
犬馬之誠不能動人譬人之誠不能動天崩
城隕霜臣初信之以臣心况徒虛語耳若葵

藿之傾葉太陽雖不爲之迴光然終向之者
誠也臣竊自比葵藿若降天地之施垂三光
之明者寔在陛下臣聞文子曰不爲福始不
爲禍先今之否隔友于同憂而臣獨唱言者
何也竊不願於聖代使有不蒙施之物必有
慘毒之懷故栢舟有天只之怨谷風有棄予
之嘆伊尹耻其君不爲堯舜孟子曰不以舜
之所以事堯事其君者不敬其君者也臣之
愚蔽固非虞伊至於欲使陛下崇光被時雍

之美宜緝熙章明之德者是臣悽悽之誠竊
所獨守寔懷鶴立企佇之心敢復陳聞者冀
陛下儻發天聰而垂神聽也

慶文帝受禪章

陛下以聖德龍飛順天革命允荅神符誕作
民主乃祖先後積德累仁世濟其美以暨於
先王勤恤民隱劬勞勗力以除其害經營四
方不遑起處是用隆茲福慶光啓于魏下承
統業贊戎前緒克廣德音綏靜內外紹先周
之舊跡襲文武之懿德保大定功海內爲一
豈不休哉

慶文帝受禪章

陛下以明聖之德受天顯命良辰即祚以臨
天下洪化宣流洋溢宇內是以普天率土莫
不承風欣慶執贄奔走奉賀闕下况臣親體
至戚懷歡踴躍

上卞太后誄表

大行太皇后資坤元之性體載物之仁齊美

姜嫄等德任姒佐政內朝惠加四海草木荷
恩含氣受潤庶鍾元吉承育萬祚何圖一旦
早棄明朝背絕臣庶悲痛靡告臣聞名以述
德誅尚及哀是以冒越諒闇之禮作誅一篇
知不足讚揚名貴以展臣蓼莪之思憂荒情
散不足觀采晉左九嬪上元皇后誅表曰伏
惟聖善宣慈仁洽六宮含弘光大德潤四海
竊聞之前志卑不誅尊少不誅長楊雄臣也
而誅漢后班固子也而誅其父皆以述揚景
者乎

黃初五年令

夫遠不可知者天也近不可知者人也傳曰
知人則哲堯猶病諸諺曰人心不同若其面
焉唯女與小人爲難養也近之則不遜遠之
則有怨詩云憂心悄悄愠于群小自世間人
或受寵而背恩或無故而入叛違顧左右曠
然無信大嚼者作斷其舌右手執斧左手執

鉞傷夷一身之中尚有不可信况於人乎唯
無深瑕潛釁隱過匿愆乃可以爲人諺曰穀
千鴛不如養一驢穀鴛養虎大無益也知韓
昭侯之弊袴良有以也使臣有三品有可以
仁義化者有可以恩惠驅者不足以導之則
當以刑罰復不足以率之則明所以不畜故
唐堯至仁不能容無益之子湯武至聖不能
養無益之臣九折臂知爲良醫吾知所以待
下矣諸吏各敬爾在位孤推一槩之平功之

宜賞於疏必與罪之宜戮在親不赦此令之
行有若皎日於戲群臣其覽之哉又黃初六
年令曰身輕於鴻毛而謗重於泰山賴蒙帝
王天地之仁違百師之典議舍三千之首戾
反我舊居襲我初服雲雨之施焉有量哉孤
以何功而納斯貺富而不恡寵至不驕者則
周公其人也孤小人爾身更以榮爲戚何者
將恐簡易之尤出於細微脫爾之愆一朝復
露也故欲修吾往業守吾初志欲使皇帝恩

在摩天使孤心常存此地將以全陛下厚德
究孤犬馬之年此難能也然固欲行衆之難
詩曰德輶如毛鮮克舉之此之謂也

上責躬詩表

臣植言臣自抱釁歸蕃刻肌刻骨追思罪戾
晝分而食夜分而寢誠以天網不可重罹聖
恩難可再恃切感相鼠之篇無禮遄死之義
形影相弔五情愧赧以罪棄生則爲古賢夕
改之勸忍垢苟全則犯詩人胡顏之譏伏惟

陛下德象天地恩隆父母施暢春風澤如時
雨是以下別荆棘者慶雲之惠也七子均養
者鳴鳩之仁也舍罪責功者明君之舉也矜
愚愛能者慈父之恩也是以愚臣徘徊於恩
澤而不敢自棄者也前奉詔書臣等絕朝心
離志絕自分黃耆永無執圭之望不圖聖詔
猥垂齒召至止之日馳心輦轂僻處西館未
奉闕庭踴躍之懷瞻望反側不勝犬馬戀主
之情謹拜表并獻詩二首詞旨淺末不足採

覽貴露下情冒顏以聞

龍見表

臣聞鳳凰復見於鄴南黃龍雙出於清泉聖德至理以致嘉瑞將棲鳳於林囿豢龍於陂池爲百姓旦夕之所觀

冬至獻襪頌表

伏見舊儀國家冬至獻履貢襪所以迎福踐長先臣或爲之頌臣旣玩其嘉藻願述朝慶千載昌期一陽嘉節四方交泰萬物昭蘇亞

歲迎祥履長納慶不勝感節情繫帷幄拜表奉賀并獻紋履七量襪若干副上獻以聞謹獻

上先帝賜鎧表

先帝賜臣鎧黑光明各一領兩當鎧一領今代以平兵革無事乞悉以付鎧曹自理

曹子建集卷第八

曹子建集卷第九

魏陳思王曹

植撰

誥咎文

五行致災先史咸以為應政而作天地之氣自有變動未必政治之所興致也于時大風發屋拔木意有感焉聊假六帝之命以誥咎祈福辭曰

上帝有命風伯雨師夫風以動氣雨以潤時陰陽協和氣物以滋亢陽害苗暴風傷條伊

周是過在湯斯遭桑林既禱慶雲克舉偃禾
之復姬公去楚况我皇德承天統民禮敬川
嶽祇肅百神享茲元吉釐福日新至若炎旱
赫羲焱風扇發嘉卉以委良木以拔何谷宜
填何山應伐何靈宜論何神宜謁於是五靈
振悚皇祇赫怒招搖驚怯攬搶奮斧河伯典
澤屏翳司風迴呵飛厲顧叱風隆息焱遏暴
元勅華嵩慶雲是興效厥豐年遂乃沈陰塊
圯甘澤微微雨我公田爰暨于私黍稷盈疇

芳草依依靈禾重穗生彼邦畿年登歲豐民
無餒飢

釋愁文

予以愁慘行吟路邊形容枯悴憂心如醉有
玄靈先生見而問之曰子將何疾以至於斯
荅曰吾所病者愁也先生曰愁是何物而能
病子乎荅曰愁之爲物惟恍惟惚不召自來
推之弗往尋之不知其際握之不盈一掌寂
寂長夜或群或黨去來無方亂我情爽其來

也難退其去也易追臨餐困於哽咽煩寃毒
於酸嘶加之以粉飾不澤飲之以兼肴不肥
溫之以金石不消麾之以神膏不希授之以
巧咲不悅樂之以絲竹增悲醫和絕思而無
措先生豈能爲我著龜乎先生作色而言曰
予徒辯子之愁形未知子愁所由而生我獨
爲子言其發矣方今大道既隱子生末季沉
溺流俗眩惑名位濯纓彈冠認趣榮貴坐不
安席食不終味遑遑汲汲或憔悴所鬻者

名所拘者利良由華薄凋損正氣吾將贈子
以無爲之藥給子以淡薄之湯刺子以玄虛
之針炙子以淳朴之方安子以恢廓之宇坐
子以寂寞之床使王喬與子遨遊而逝黃公
與子詠歌而行莊子與子具養神之撰老聃
與子致愛性之方趣避路以棲跡乘輕雲以
翱翔於是精駭魂散改心回趣願納至言仰
崇玄度衆愁忽然不辭而去

七啓

昔枚乘作七發傅毅作七激張衡作七辯崔
駟作七依辭各美麗予有慕之焉遂作七啓
并命王粲作焉

玄微子隱居大荒之庭飛遯離俗澄神定靈
輕祿傲貴與物無營耽虛好靜羨此永生獨
馳思乎天雲之際無物象而能傾於是鏡機
子聞而將往說焉駕超野之駟乘追風之輿
經迥漠出幽墟入乎泱漭之野遂屆玄微子
之所居其居也左激水右高岑背洞壑對芳

林冠皮弁被文裘出山岫之潛穴倚峻崖而
嬉游志飄飄焉巍巍焉似若狹六合而隘九
州若將飛而未逝若舉翼而中留於是鏡機
子攀葛藟而登距岳而立順風而稱曰予聞
君子不遯俗而遺名智士不背世而滅勲今
吾子棄道藝之華遺仁義之英耗精神乎虛
廓廢人事之紀經譬若畫形於無象造響於
無聲未之思乎何所規之不通也玄微子俯
而應之曰嘻有是言乎夫太極之初混沌未

分萬物紛錯與道俱隆蓋有形必朽有跡必窮茫茫元氣誰知其終名穢我身位累我躬竊慕古人之所志仰老莊之遺風假靈龜以托喻寧掉尾於塗中

鏡機子曰夫辯言之艷能使窮澤生流枯木發榮庶感靈而激神况近在乎人情僕將爲君子說游觀之至娛演聲色之妖靡論變化之至妙敷道德之弘麗願聞之乎玄微子曰吾子整身倦世探隱拯沉不遠遐路幸見光

臨將敬滌耳以聽玉音

鏡機子曰芳菰精糲霜蓄露葵玄熊素膚肥
豢膿肌蟬翼之割割纖析微累如疊穀離若
散雪輕隨飛風刃不轉切山鷄斤鷄珠翠之
珍塞芳蓮之巢龜膾西海之飛鱗臞江東之
潛鼉騰漢南之鳴鶉糝以芳酸甘和既醇玄
冥適鹹蓐收調辛紫蘭丹椒施和必節滋味
既殊遺芳射越乃有春清縹酒康狄所營應
化則變感氣而成彈徵則苦發扣宮則甘生

於是盛以翠樽酌以雕觴浮蟻鼎沸酷烈馨香可以和精神可以娛腸此餚饌之妙也子能從我而食之乎玄微子曰予甘藜藿未暇此食也

鏡機子曰步光之劍華藻繁縟飾以文犀雕以翠綠綴以驪龍之珠錯以荆山之玉陸斷犀象未足稱雋隨波截鴻水不漸刃九旒之冕散曜垂文華組之纓從風紛紜佩則結綠懸黎寶之妙微符采照爛流景揚輝黼黻之

服紗縠之裳金華之鳥動趾遺光繁飾參差微鮮若霜緄佩綢繆或彫或錯薰以幽若流芳肆布雍容間步周旋馳燿南威爲之解顏西施爲之巧咲此容飾之妙也子能從我而服之乎玄微子曰予好毛褐未暇此服也鏡機子曰馳騁足用蕩思游獵可以娛情僕將爲吾子駕雲龍之飛駟飾玉輅之繁纓垂宛虹之長綏抗招搖之華旂挿忘歸之矢秉繁弱之弓忽躡景而輕鷺逸奔驥而超遺風

於是磳填谷塞榛藪平夷綠山置罝彌野張
罟下無漏跡上無逸飛鳥集獸屯然後會圍
獠徒雲布武騎霧散丹旗耀野戈及皓旰曳
文狐掩狡兔捎鷓鷯拂振鷺當軌見藉值足
遇踐飛軒電逝獸隨輪轉翼不暇張足不及
騰動觸飛鋒舉挂輕罾搜林索險探薄窮阻
騰山赴壑風厲焱舉機不虛發中必飲羽於
是人稠網密地逼勢脇哮闕之獸張牙奮鬣
志在觸突猛氣不懼乃使北宮東郭之疇生

抽豹尾分裂羆肩形不抗手骨不隱拳批熊
碎掌拉虎摧班野無毛類林無羽群積獸如
陵飛翮成雲於是駮鍾鳴鼓收旌弛旆頓網
縱網罷獠回邁駿駟齊驤揚鑿飛沫俯倚金
較仰撫翠蓋雍容暇豫娛志方外此羽獵之
妙也子能從我而觀之乎玄微子曰予性樂
恬靜未暇此觀也

鏡機子曰間宮顯敞雲屋皓旰崇景山之高
基迎清風而立觀彤軒紫柱文棖華梁綺井

含葩金墀玉廂溫房則冬服絺綌清室則中
夏含霜華閣綠雲飛陞陵虛俯眺流星仰觀
八隅升龍攀而不逮眇天際而高居繁巧神
怪變名異形班輸無所措其斧斤離婁爲之
失睛麗草交植殊品詭類綠葉朱榮熙天曜
日素水盈沼叢木成林飛翮陵高鱗甲隱深
於是逍遙暇豫忽若忘歸乃使任子垂釣魏
氏發機芳餌沈水輕繳弋飛落翳雲之翔鳥
援九淵之靈龜然後採菱花擢水蘋弄蛛蟻

戲鮫人諷漢廣之所詠覲游女於水濱耀神
景於中沚被輕縠之織羅遺芳烈而靜步抗
皓手而清歌歌曰望雲際今有好仇天路長
今往無由佩蘭蕙今爲誰脩嫵婉絕今我心
愁此宮館之妙也子能從我而居之乎玄微
子曰予耽崑穴未暇此居也

鏡機子曰旣游觀中原逍遙間宮情放志蕩
淫樂未終亦將有才人妙妓遺世越俗揚北
里之流聲紹陽阿之妙曲爾乃御文軒臨洞

庭琴瑟交揮左篴右笙鍾鼓俱振簫管齊鳴
然後姣人乃被文縠之華袿振輕綺之飄颻
戴金搖之熠燿揚翠羽之雙翹揮流芳耀飛
文歷盤鼓煥繽紛長裾隨風悲歌入雲躡捷
若飛蹈虛遠蹠陵躍超驤蛇蟬揮霍翔爾鴻
翥澌然鳧沒縱輕體以迅赴景追形而不逮
飛聲激塵依威厲響才捷若神形難爲象於
是爲歡未溌白日西頽散樂變飾微步中閨
玄眉弛兮鉛花落收亂髮兮拂蘭澤形媚服
兮揚幽若紅顏宜咲睇盼流光時與吾子携
手同行踐飛除即閨房花燭爛幄幕張動朱
唇發清商揚羅袂振華裳九秋之夕爲歡未
央此聲色之妙也子能從我而遊之乎玄微
子曰予願清虛未暇及此遊也

鏡機子曰予聞君子樂奮節以顯義烈士甘
危軀以成仁是以雄俊之徒交黨結倫重氣
輕命感分遺身故田光伏劒於北燕公叔畢
命於西秦果毅輕斷虎步谷風威懾萬乘華

夏稱雄詞未及終而玄微子曰善鏡機子曰
此乃游俠之徒耳未足稱妙也若夫田文無
忌之儔乃上古之俊公子也皆飛仁揚義騰
躍道藝遊心無方抗志雲際陵轢諸侯驅馳
當世揮袂則九野生風慷慨則氣成虹蜺吾
子若當此之時能從我而友之乎玄微子曰
予亮願焉然方於大道有累如何

鏡機子曰世有聖宰翼帝霸世同量乾坤等
曜日月玄化參神與靈合氣惠澤播於黎苗
威靈振乎無外超隆平於殷周踵羲皇而齊
泰顯朝惟清王道遐均民望如草我澤如春
河濱無洗耳之士喬嶽無巢居之民是以俊
乂來仕觀國之光舉不遺材進各異方讚典
禮於辟雍講文德於明堂正流俗之華說綜
孔氏之舊章散樂移風國富民康神應休臻
屢獲嘉祥故甘露紛而晨降景星宵而舒光
觀遊龍於神淵聆鳴鳳於高岡此霸道之至
隆而雍熙之盛際然主上猶尚以沈恩之未

廣懼聲教之未厲采英奇於仄陋宣皇明於
崑穴此甯子商歌之秋而呂望所以投綸而
逝也吾子爲太和之民不欲仕陶唐之世乎
於是玄微子攘袂而興曰偉哉言乎近者吾
子所述華淫欲以厲我祗攬予心至聞天下
穆清明君莅國覽盈虛之正義知頑素之迷
惑令予廓爾身輕若飛願反初服從子而歸

九詠

芙蓉車兮桂衡結萍蓋兮翠旌四蒼虬兮翼

轂駕陵魚兮驂鯨茵薦兮蘭席蕙幃兮苓牀
抗南箕兮簸瓊葢挹天河兮滌玉觴靈旣降
兮泊靜默登文階兮坐紫房服春榮兮猗靡
雲居繞兮容裔冠北辰兮岌峨帶長虹兮陵
厲蘭肴御兮玉俎陳雅音奏兮文虞羅感漢
廣兮羨游女揚激楚兮詠湘娥臨回風兮浮
漢渚目牽牛兮眺織女交有際兮會有期嗟
痛吾兮來不時來無見兮進無聞泣下雨兮
嘆成雲先后悔其靡及冀后土之一悟猶搨

轡而繁策馳覆車之危路群乘舟而無楫將
何川而能度何世俗之蒙昧悼邦國之未靜
焚椒蘭其望治由倒裳而求領尋湘漢之長
流採芳岸之靈芝遇遊女於水裔採菱花而
結詞野蕭條以極望曠千里而無人民生期
於必死何自苦以終身寧作清水之沉泥不
爲濁路之飛塵

柳頌序

予以閑暇駕言出遊過友人楊德祖之家視

其屋宇寥廓庭中有一柳樹聊戲刊其樹葉
故著斯文表之遺翰遂因辭勢以譏當今之
士

司馬仲達書

今賊徒欲保江表之城守歐吳耳無有爭雄
於宇角勝於平原之志也故其俗蓋以洲渚
爲營壁江淮爲城塹而已若可得挑致則吾
一旅之卒足以敵之蓋弋鳥者矯其矢釣魚
者理其綸此皆度彼爲慮因象說宜者也今

足下曾無矯矢理綸之謀徒欲候其離舟伺
其登陸乃圖并吳會之地牧東野之民恐非
主上授節將之心也

與楊德祖書

植白數日不見思子爲勞想同之也僕少小
好爲文章迄至于今二十有五年矣然今世
作者可略而言也昔仲宣獨步於漢南孔璋
鷹揚於河朔偉長擅名於青土公幹振藻於
海隅德璉發跡於北魏足以高視於上京當

此之時人人自謂握靈蛇之珠家家自謂抱
荆山之玉吾王於是設天網以該之頓八紘
以掩之今悉集茲國矣然此數子猶復不能
飛軒絕跡一舉千里也以孔璋之才不閒於
詞賦而多自謂能與司馬長卿同風譬畫虎
不成反爲狗也前有書嘲之反作論盛道僕
讚其文夫鍾期不失聽于今稱之吾亦不能
妄嘆者畏後世之嗤余也世人著述不能無
病僕嘗好人譏彈其文有不善應時改定昔

丁敬禮嘗作小文使僕潤飾之僕自以才不
過若人辭不爲也敬禮謂僕卿何所宜難文
之佳惡吾自得之後世誰相知定吾文者邪
吾嘗歎此達言以爲美談昔尼父之文辭與
人通流至於制春秋游夏之徒乃不能措一
辭過此而言不病者吾未之見也蓋有南威
之容乃可以論於淑媛有龍泉之利乃可以
議於斷割劉季緒才不能逮於作者而好詆
訶文章摘摭利病昔田巴毀五帝罪三王訾

五霸於稷下一旦而服千人魯連一說使終
身杜口劉生之辯未若田氏今之仲連求之
不難可無息乎人各有好尚蘭茝蓀蕙之芳
衆人所好而海畔有逐臭之夫咸池六莖之
發衆人所共樂而墨翟有非之之論豈可同
哉今往僕少小所著辭賦一通相與夫街談
巷說必有可采擊轅之歌有應風雅匹夫之
思未易輕棄也辭賦小道固未足以揄揚大
義彰示來世也昔揚子雲先朝執戟之臣耳

不曹集卷九
猶稱壯夫不爲也吾雖薄德位爲蕃侯猶庶
幾勦力上國流惠下民建永世之業流金石
之功豈徒以翰墨爲勲績辭賦爲君子哉若
吾志未果吾道不行則將采庶官之實錄辯
時俗之得失定仁義之衷成一家之言雖未
能藏之於名山將以傳之於同好非要之皓
首豈今日之論乎其言之不慚待惠子之知
我也明早相迎書不盡懷曹植白

與吳季重書

植白季重足下前日雖因常調得爲密坐雖
燕飲彌日其於別遠會稀猶不盡其勞積也
若夫觴酌陵波於前簫笳發音於後足下鷹
揚其體鳳觀虎視謂蕭曹不足儔衛霍不足
侔也左顧右盼謂若無人豈非君子壯志哉
過屠門而大嚼雖不得肉貴且快意當斯之
時願舉太山以爲肉傾東海以爲酒伐雲夢
之竹以爲笛斬泗濱之梓以爲箏食若填巨
壑飲若灌漏卮其樂固難量豈非大丈夫之

樂哉然日不我與曜靈急節面有過景之速
別有參商之闊思欲抑六龍之首頓羲和之
轡折若木之華閉濛汜之谷天路高邈良久
無緣懷戀反側何如何得所來訊文采委
曲擘若春榮瀏若清風申詠反覆曠若復面
其諸賢所著文章想還所治復申詠之也可
令憲事小吏諷而誦之夫文章之難非獨今
也古之君子猶亦病諸家有千里驥而不珍
焉人懷盈尺和氏而無貴矣夫君子而不知

音樂古之達論謂之通而蔽墨翟不好伎何

爲過朝歌而迴車乎足下好伎而正值墨翟

一作迴車之縣想足下助我張目也又聞足

下在彼自有佳政夫求而不得者有之矣未
有不求而自得者也且改轍而行非良樂之
御易民而治非楚鄭之政願足下勉之而已
矣適對嘉賓口授不悉往來數相聞曹植白

任城王誄

昔二虢佐文旦爽翼武於休我王魏之元輔

將崇懿跡等號齊魯如何奄忽命不是與仁
者悼沒兼彼殊類矧我同生能不憐怛目想
官墀心在乎素彷彿魂神馳情陵墓凡夫受
命達者狗名王雖薨徂功著丹青人誰不沒
德貴有遺乃作誄曰

幼有令德光輝珪璋孝殊閔氏義達參商溫
溫其恭爰柔克剛心存建業王室是匡矯矯
元戎雷動雨徂橫行燕氏威懼北胡奔虜無
竄還戰高柳王率壯士常爲君首宜究長年

永保皇家如何奄忽景命不遐同盟飲淚百
寮咨嗟

大司馬曹休誄

於穆公侯魏之宗室明德紀踵奕世純粹闡
弘汎愛仁以接物藝以爲華體斯亮實年沒
弱冠志在雄英高揖名師發言有章東夏翕
然稱曰龍光貧而無怨孔以爲難嗟我公侯
屢空是安不耽世祿親悅爲歡好彼蓬樞甘
彼瓢簞味道忘憂踰憲超顏矯矯公侯不撓

其厄呵叱三軍躬奮雉戟足蹴白刃手按飛
鏑終弭淮南保我疆場

光祿大夫荀侯誄

如水之清如玉之潔法而不威和而不蕪百
察欬歔天子霑纓機女投杼農夫輟畊輪結
徹而不轉馬悲鳴而倚衡

平原懿主公誄

俯振地紀仰錯天文悲風激興霜焱雪零凋
蘭天蕙良幹以泯於惟懿王瑛瑤其質協策

應期含英秀出岐嶷之姿寔朗寔極在生十
旬察人識物儀同聖表聲協音律驤眉識往
俛首知來求顏必咲和音則該阿保接手侍
御充傍常在襁褓不停幃牀專愛一宮取玩
聖皇何圖奄忽惟天之殃魂神遷移精爽翺
翔號之不應聽之不聆帝用吁嗟嗚呼哀哉
憐爾早沒不逮陰光改封大郡惟帝舊疆建
土開家邑移蕃王琨珮惟鮮朱紱斯煌國號
旣崇哀爾孤獨配爾君子華宗貴族爵以列

侯銀艾優渥成禮于宮靈輻交轂生雖異室
歿同山嶽爰構玄宮玉石交連朱房皓壁皓
曜電鮮飾終備泣法生象存長延繕脩神閨
掩扉二柩並降雙魂孰依人誰不歿憐爾尚
微阿保激感上聖傷悲城闕之詩以日踰歲
况我愛子神光長滅扃關一闔曷其復晰

武帝誄

於惟我王承運之衰神武震發群雄戡夷拯
民于下登帝太微德美且奧功越彭韋九德

光備萬國作師寢疾不興聖體長違華夏飲
淚黎庶含悲神翳功顯身沈名飛敢揚聖德
表之素旗乃作誄曰

於穆我王胄稷胤周賢聖是紹元懿允休先
侯佐漢實維平陽功成績著德昭二王民以
寧一典詠有章我王承統文姿特生年在志
學謀過老成奮臂舊邦翻身上京表與我王
交兵若神張陳背誓傲帝虐民擁徒百萬虎
視朔濱我王赫怒戎車列陳武卒處闕如雷

如電攬搶北掃舉不浹辰紹遂奔北河朔是
賓振旅京師帝嘉厥庸乃位丞相揔攝三公
進受上爵臨君魏邦九錫昭備大路光龍玄
鑑靈察探幽洞微下無僞情茲不容非敦儉
尚古不玩珠玉以身先下民以純樸聖性嚴
毅手脩清一惟善是嘉靡䟽靡昵怒過雷電
喜踰春日萬國肅虔望風震肅旣揔庶政兼
覽儒林窮著雅頌被之琴瑟茫茫四海我王
康之微微漢嗣我王匡之群傑扇動我王服

之喁喁黎庶我王育之光有天下萬國作君
虔奉本朝德美周文以寬克衆每征必舉四
夷賓服功夷聖武翼帝王世神武鷹揚左鉞
右旄威凌伊呂年踰耳順體壯志肅乾乾庶
事氣過方叔宜並南嶽君國無窮如何不弔
禍終聖躬棄離臣子背世長終兆民號咷仰
愬上穹旣以約終令節不衰旣即梓宮躬御
綴衣璽不存身唯紼是荷明器無飾陶素是
嘉旣次西陵幽閨啓路群臣奉迎我王安厝

窈窕玄宇三光不晰幽闔一局尊靈永蟄聖
上臨穴哀號靡及群臣陪臨佇立以泣去此
昭昭於彼冥冥永棄兆民下君百靈千伐萬
乘曷時復形

文帝誄

嗚呼哀哉于時天震地駭崩山隕霜陽精薄
景五緯錯行百姓吁嗟萬國悲悼若喪考妣
恩過慕唐擗踊郊墊仰想穹蒼僉曰何爲早
世隕喪嗚呼哀哉悲夫大行忽焉光滅永棄

萬民雲往雨絕承問恍惚惛惛哽咽袖鋒抽
刃欲自疆斃追慕三良甘心同穴感彼南風
惟以鬱滯終於偕沒指景自逝考諸先記尋
之誓言生若浮寄惟德可論朝聞夕逝孔志
所存皇雖一歿天祿永延何以述德表之素
旃何以詠功宣之管絃乃作誄曰

皓皓太素兩儀始分中和產物肇有人倫爰
暨三皇寔秉道真降逮五帝繼以懿純三代
製作踵武立勲季嗣不綱網漏于秦崩樂滅

學儒坑禮焚二世而殲漢氏乃因弗求古訓
羸政是遵王綱帝典闡爾無聞末光幽昧道
究運遷乾坤回歷簡聖授賢乃眷大行屬以
黎元龍飛啓祚合契上玄五行定紀改號革
年明明赫赫受命于天仁風偃物德以禮宣
祥惟聖質疑在幼妍庶幾六典學不過庭潛
心無妄元志清冥才秀藻朗如玉之瑩聽察
無響瞻覩未形其剛如金其貞如瓊如冰之
潔如砥之平爵必無私戮違無輕心鏡萬機

攬照下情思良股肱嘉昔伊呂搜揚側陋舉
湯代禹拔才崑穴取士蓬戶唯聽是索弗拘
禰祖宅土之表道義是圖弗營厥險六合是
虞齊契共遵下以純民恢折規矩克紹前人
科條品制褒貶以因乘殷之輅行夏之辰金
根黃屋翠葆龍鱗紉冕崇麗衡紉維新尊肅
禮容矚之若神方牧妙舉欽於恤民虎將荷
節鎮彼四鄰朱旗所勦九壤被震疇克不若
孰敢不臣縣旌海表萬里無塵虜備凶徹烏

殪江岷摧若涸魚乾若脯鱗肅慎納貢越裳
效珍條支絕域獻欵內賓德儕先王功侔太
古上靈降瑞黃初叔祜河龍洛龜陵波遊下
平均應繩神鸞翔舞數莢階除系風扇暑皓
獸素禽飛走郊野神鍾寶鼎形自舊土雲英
甘露瀝塗被宇靈芝冒沼朱華陰渚回回凱
風祁祁甘雨稼穡豐登我稷我黍家佩惠君
戶蒙慈父圖致大和洽德全義將登泰山先
皇作儷鐫石紀勲兼錫衆瑞方隆封禪歸功

天地賓禮百靈勳命視規望祭四嶽燎封奉
柴肅于南郊宗祀上帝三牲既供夏禘秋嘗
元侯佐祭獻璧奉璋鸞輿幽謁龍旂太常爰
迄太廟鐘鼓鏗鏘頌德詠功八佾鏘鏘皇祖
既饗烈考來享神具醉止降茲福祥天地震
蕩大行康之三辰暗昧大行光之皇紘惟絕
大行綱之神器莫統大行當之禮樂廢弛大
行張之仁義陸沉大行揚之潛龍隱鳳大行
翔之䟽狄遐康大行匡之在位七載元功仍

舉將永大和絕迹三五宜作物師長爲神主
壽終金石等筭東父如何奄息摧身后土俾
我榮榮靡瞻靡顧嗟嗟皇穹胡寧忍務嗚呼
哀哉明監吉凶體遠存亡深垂典制申之嗣
王聖上虔奉是順是將乃翔玄宇基爲首陽
擬迹穀林追堯慕唐合山同陵不樹不疆塗
車芻靈珠玉靡藏百神警侍來賓幽堂耕禽
田獸望魂之翔於是俟大隧之致力今練元
辰之淑禎潛華體於梓宮馮正殿以居靈顧

望嗣之號咷今存臨者之悲聲悼晏駕之旣
往今感容車之速征浮飛魂於輕霄今就黃
墟以滅形背三光之昭晰今歸玄宅之冥冥
嗟一往之不返今痛闕闕之長局咨遠臣之
眇眇今成凶諱以怛驚心孤絕而靡告今紛
流涕而交頸思恩榮以橫奔今闕闕塞之堯
崢顧衰絰以輕舉今念關防之我嬰欲高飛
而遙憇今憚天綱之遠經遙投骨於山足今
報恩養於下庭慨拊心而自悼今懼施重而

命輕嗟微軀之是效今甘九死而忘生幾司
命之役籍今先黃髮而隕零天蓋高而察卑
今異神明於我聽獨鬱伊而莫告今追顧景
而憐形奏斯文以寫思今結翰墨以敷誠嗚
呼哀哉

卞太后誄

率土噴薄三光改度陵頽谷踊五行牙錯皇
室蕭條羽檄四布百姓歔歔嬰兒號慕若喪
考妣天下縞素聖者知命殉道寶名義之攸

在亦棄厥生敢揚后德表之旒旌光垂罔極
以慰我情乃作誄曰

我王之生坤靈是輔作合于魏亦光聖武篤
生文帝紹虞之緒龍飛紫宸奄有九土詳惟
聖善岐嶷秀出德配姜嫄不忝先哲玄覽萬
機兼才備藝汎納容衆含垢藏疾仰奉諸姑
降接儔列陰處陽潛外明內察及踐大位母
養萬國温温其人不替明德悼彼邊氓未遑
宴息恒勞庶事兢兢翼翼親桑蠶館爲天下

式樊姬霸楚書載其庸武王有亂孔嘆其功
我后齊聖克暢丹聰不出房闈心照萬邦年
踰耳順乾乾匪倦珠玉不玩躬御綈練日旰
忘飢臨樂勿聽去奢即儉曠世作顯慎終如
始蹈和履貞恭事神祇昭奉百靈跼天躋地
祇畏神明敬惟慎獨報禮幽冥虔肅宗廟蠲
薦三牲降福無疆祝云其誠宜享斯祐蒙祉
自天何圖凶咎不勉斯年嘗禱盡禮有篤無
瘡豈命有終神食其言遺孤在疚承謹東藩

擗踊郊甸洒淚中原追號皇妣棄我何遷昔
垂顧復今何不然空宮寥廓棟宇無煙物省
階塗髣髴櫺軒仰瞻帷幄俯察几筵物不毀
故而人不存痛莫酷斯彼蒼者天遂臻魏都
游魂舊邑大隧開塗靈魄斯戢歎息霧興揮
淚雨集徘徊輻輳號咷弗及神光旣幽佇立
以泣

金瓠哀辭

金瓠予之首女雖未能言固已授色知心矣

生十九旬而夭折乃作此辭辭曰在襁褓而撫育向孩笑而未言不終年而夭絕何見罰於皇天信吾罪之所招非弱子之無僇去父母之懷抱滅微骸於糞土天長地久人生幾時先後無覺促爾有期

行女哀辭

行女生于季秋而終於首夏三年之中二子頻喪伊上帝之降命何短脩之難裁或華髮以終年或懷妊而逢灾感前愛之未闕復新

殃之重來方朝華而晚敷比辰露而先晞感逝者之不追悵情忽而失度天蓋高而無階懷此恨其誰訴

仲雍哀辭

曹喈字仲雍魏太子之仲子也三月而生五月而亡昔后稷之在寒氷鬪穀之在楚澤咸依鳥馮虎而無風塵之灾今之玄弟文茵無寒氷之慘羅幃綺帳暖於翔鳥之翼幽房閑宇密於雲夢之野慈母良保仁乎鳥虎之情

卒不能延期於墓載雖六旬而天殃彼孤蘭
之眇眇亮成幹其畢榮哀綿綿之弱子早背
世而潛形且四孟之未周將願乎一齡陰雲
回於素蓋悲風動其扶輪臨埏闈以歛歔淚
流射而沾巾

王仲宣誄

并序

建安二十二年正月二十四日戊申魏故侍
中關內侯王君卒嗚呼哀哉皇穹神察喆人
是恃如何靈祇殲我吉士誰謂不痛早世即

冥誰謂不傷華繁中零存亡分流天遂同期
朝聞夕沒先民所思何用誄德表之素旗何
以贈終哀以送之遂作誄曰

猗歟侍中遠祖彌芳功高建業佐武伐商爵
同齊魯邦嗣絕亡流裔畢萬勲績惟光晉獻
賜封于魏之疆天開之祚末胄稱王厥姓斯
氏條分葉散世茲芳烈揚聲秦漢會遭陽九
炎光中矇世祖撥亂爰建時雍三台樹位履
道是鍾寵爵之加匪惠惟恭自君二祖爲光

爲龍僉曰休哉宜翼漢邦或統太尉或掌司
空百揆惟叙五典克從天靜人和皇教遐通
伊君顯考奕葉佐時入管機密朝政以治出
臨朔岱庶績咸熙君以淑懿繼此洪基既有
令德材技廣宣強記洽聞幽讚微言文若春
華思若涌泉發言可詠下筆成篇何道不治
何藝不閒棊局逞巧博奕惟賢皇家不造京
室隕顛宰臣專制帝用西遷君乃羈旅離此
阻艱翕然鳳舉遠竄荆蠻身窮志達居鄙行

鮮振冠南嶽濯纓清川潛處蓬室不干勢權
我公奮鉞耀威南楚荆人或違陳戎講武君
乃義發筭我師旅高尚霸功投身帝宇斯言
旣發謀夫是與是與伊何響我明德投戈編
都稽顙漢北我公寔嘉表揚京國金龜紫綬
以彰勲則勲則伊何勞謙靡已憂世忘家殊
略卓峙乃署祭酒與君行止筭無遺策畫無
失理我王建國百司俊乂君以顯舉秉機省
闈戴蟬珥貂朱衣皓帶入侍帷幄出擁華蓋

榮耀當世芳風掩藹嗟彼東夷憑江阻湖騷
擾邊境勞我師徒光光戎輅霆駭風徂君侍
華轂輝輝王塗思榮懷附望彼來威如何不
濟運極命衰寢疾彌留吉往凶歸嗚呼哀哉
翩翩孤嗣號慟崩摧發軫北魏遠迄南淮經
歷山河泣涕如頽哀風興感行雲徘徊游魚
失浪歸鳥忘棲嗚呼哀哉吾與夫子義貫丹
青好和琴瑟分過友生庶幾遐年携手同征
如何奄忽棄我夙零感昔宴會志各高厲予

戲夫子金石難弊人命靡常吉凶異制此驩
之人孰先隕越何寤夫子果乃先逝又論死
生存亡數度子猶懷疑求之明據儻獨有靈
游魂泰素我將假翼飄飄高舉超登景雲要
子天路喪柩旣臻將及魏京靈輶回軌白驥
悲鳴虛廓無見藏影蔽形孰云仲宣不聞其
聲延首歎息雨泣交頸嗟乎夫子永安幽冥
人誰不歿達士狗名生榮死哀亦孔之榮嗚
呼哀哉

曹子建集卷第九

曹子建集卷第十

魏陳思王曹

植撰

漢二祖優劣論

有客問予曰夫漢二帝高祖光武俱爲授命撥亂之君此時事之難易論其人之優劣孰者爲先予應之曰昔漢之初興高祖因暴秦而起遂誅強楚光有天下功齊湯武業流後嗣誠帝王之元勳人君之盛事也然而名不繼德行不純道身歿之後崩亡之際果令凶

婦肆耽酷之心嬖妾被人豕之刑亡趙幽囚
禍殃骨肉諸呂專權社稷幾移凡此諸事豈
非高祖寡計淺慮以致然彼之雄材大略倣
儻之節信當世至豪健壯傑士也又其梟將
畫臣皆古今之鮮有歷世之希覩彼能任其
才而用之聽其言而察之故兼天下有帝位
流巨功而遺元勳也世祖體乾靈之休德稟
貞和之純精通黃鍾之妙理韜亞聖之懿才
其爲德也通達而多識仁智而明恕重慎周

密樂施而愛人值陽九無妄之世遭炎光厄
會之運殷爾雷發赫然神舉用武略以攘暴
興義兵以殘賊神光前驅威光先游軍未出
於南京莽已弊於西都夫其蕩滌凶穢勦除
醜類若順迅風而縱烈火曬白日而掃朝雲
也爾乃廟謀而後動衆計定而後行師故攻
無不陷之壘戰無奔北之卒是以群下欣欣
歸心聖德宣仁以和衆邁德以來遠故寶融
聞聲而影附馬援一見而嘆息股肱有濟濟

之美元首有穆穆之容敦睦九族有唐虞之
稱高尚純樸有羲皇之素謙虛納下有吐握
之勞留心庶事有日昃之勤乃規弘跡而造
皇極創帝道而立德基是以計功則業殊比
隆則事異旌德則靡愆言行則無穢量力則
勢微論輔則力劣卒能握乾坤之休徵應五
百之顯期立不刊之遐迹建不朽之元功金
石播其休烈詩書載其勲懿故曰光武其優
也

魏德論

元氣否塞玄黃噴薄晨星亂逆陰陽舛錯四
海鼎沸蕭條沙漠武王之興也以道陵殘義
氣風發神戈退指則妖氛順制靈旗一舉則
朝陽播越惟我聖后神武蓋天威光佐掃辰
彗北蠻首尾爭擊氣齊率然乃電北席卷千
里隱乎若崩嶽盱乎若潰海愠彼蠻夏蠢爾
弗恭措我蕭斧簡武練鋒星陳而天運振耀
乎南封荆人封靡交益影從軍蘊餘勢襲利

乘權蕩鬼區於白水摘矯制於遐川仰屬目
於條支晞弱水之潺湲薄張騫於大夏笑驃
騎於祁連其化之也如神其養之也如春柔
遠能邇誰敢不賓憲度增飾日曜月明跡存
乎建安道隆乎延康於是漢氏歸義顧音孔
昭顯禪天位希唐效堯上猶謙謙弗訥也發
不世之明詔薄居而弗從蹈北人之清節美
石戶之高介義貫金石神明已興神祇致祥
乾靈効祐於是群公卿士功臣列辟率爾而

進曰昔文王三分居二以服事殷非能之而
弗欲蓋欲之而弗能况天網弗禁皇綱圯紐
侯民非復漢萌尺土非復漢有故皇父創迹
於前陛下光美於後蓋所謂勲成於彼位定
於此者也將使斯民播秬鬯植靈芝鋤歧穗
挹醴滋遂乃凱風回焮甘露匝時農夫詠於
田隴織婦欣而綜絲黃吻之齒含哺而怡鮐
背之老擊壤而嬉古雖稱乎赫胥曷若斯之
大治乎于時上富於春秋聖德汪濊奇志妙

思神鑒靈察方將審御陰陽增耀日月極禎
祥於遐奧飛仁風以樹惠既遊精於萬機復
逍遙乎六藝兼覽儒林抗思乎文藻之場囿
容與乎道術之壇畔超天路而高峙階清雲
以妙觀將參跡於三皇豈徒論功於大漢天
地位矣九域清矣皇化四達帝猷成矣明哉
元首股肱貞矣禮樂既作興頌聲矣固封泰
山禪梁甫歷名山以祈福周五方之靈宇越
八九於往素踵帝王之靈矩流餘祚於黎烝

鍾元吉乎聖主

相論

世固有人身瘠而志立體小而名高者於聖
則否是以堯眉八彩舜目重瞳禹耳參漏文
王四乳然則世亦有四乳者此則駑馬一毛
似驥耳又曰宋臣有公孫呂者長七尺面長
三尺廣三寸若此之狀蓋遠代而求非一世
之異也使形殊於外道合其中名震天下不
亦宜乎語云無憂而戚憂必及之無慶而歡

樂必隨之此心有先動而神有先知則有先見也故扁鵲見桓公知其將亡申叔見巫臣知其竊妻而逃也荀子曰以爲天不知人事耶則周公有風雷之灾宋景有三舍之福以爲知人事耶楚昭有弗榮之應魏文無延期之報由是言之則天道之與相占可知而疑不可得而無也

辯道論

世有方士吾王悉所招致甘陵有甘始盧江

有左慈陽城有郝儉善辟穀悉號數百歲所以集之魏國者誠恐此人之徒接姦詭以欺衆行妖惡以惑民豈復欲觀神仙於瀛洲求安期於邊海釋金輅而顧雲輿棄文驥而求飛龍哉夫帝者位殊萬國富有天下威尊彰明齊光日月宮殿闕庭焜耀紫薇何顧乎王母之宮崑崙之域哉夫三鳥被致不如百官之美也素女嫦娥不若椒房之麗也雲衣羽裳不若黼黻之飾也鴛鴦載霓不若乘輿之

盛也瓊蕊玉華不若玉圭之潔也而顧爲匹夫所罔納虛妄之辭信眩感之說隆禮以招弗臣傾產以供虛求散玉爵以榮之清閒館以居之經年累稔終無一驗雖復誅其身滅其族紛然足爲天下一笑矣若夫玄黃所以娛目鏗鏘所以聳耳媛妃所以紹光芻豢所以悅口也何以甘無味之味聽無聲之樂觀無彩之色也

藉田說

春畊于藉田郎中令侍寡人焉顧而謂之曰昔者神農氏始嘗萬草教民種植今寡人之興此田將欲以擬乎治國非徒供耳目而已也夫營疇萬畝厥田上下經以大陌帶以橫阡此亦寡人之封壇也日殄沒而歸館晨未昕而即野此亦寡人之先下也菽藿特疇禾黍異田此亦寡人之理政也及其息泉涌庇重陰懷有虞撫素琴此亦寡人之所親賢也刺藜臭蔚棄之遠疆此亦寡人之所遠佞也

若年豐歲登果茂菜滋則臣僕小大咸取驗
焉又曰封人有能以輕鑿修鈎去樹之蝎者
樹得以茂繁中舍人曰不識天下者亦有蝎
者乎寡人告之曰昔三苗共工鯀驩兜非堯
之蝎歟問曰諸侯之國亦有蝎乎寡人告之
曰齊之諸田晉之六卿魯之三桓非諸侯之
蝎歟然三國無輕鑿修鈎之任終於齊篡魯
弱晉國以分不亦痛乎曰不識爲君子者亦
蝎乎寡人告之曰固有之也富而慢貴而驕

殘仁賊義甘財悅色此亦君子之蝎也天子
勤耘以牧一國大夫勤耘以收世祿君子勤
耘以顯令德夫農者始於種終於穫澤旣時
矣苗旣美矣棄而不耘則改爲荒疇蓋豐年
者期於必收譬脩道亦期於歿身也

令禽惡鳥論

國人有以伯勞生獻者王召見之侍臣曰世
人同惡伯勞之鳴敢問何謂也王曰昔尹吉
甫用後妻之說殺孝子伯奇吉甫後悟追傷

伯奇出遊于田見鳥鳴于桑見其聲噉然吉甫動心曰伯勞乎乃撫翼其音尤切吉甫乃顧謂曰伯勞乎是吾子棲吾輿非吾子飛勿居鳥尋聲而栖于蓋吉甫遂射殺後妻以謝之故俗惡伯勞之鳴言所鳴之家必有尸也此好事者附名爲之說而今普傳惡之斯實否也伯勞以五月而應陰氣之動陰爲賊害蓋賊害之鳥也其聲鴟鴞然故俗憎之若其爲人災害愚民之所信通人之所略也鳥鳴

之惡自取憎人言之惡自取滅不有能累於當世也而凶人之行弗可易梟鳥之能不可更者天性然也昔荆人之梟將巢於吳鳩遇之曰何去荆而巢吳乎梟曰荆人惡予之聲鳩曰子不能革子之音則吳楚之民不異情也爲子計者莫若宛頸戢翼終身勿復鳴也昔會朝議者有人問曰寧有聞梟食其母乎有荅之者曰嘗聞鳥反哺未聞梟食母也問者慚唱不善也得善者莫不訓而放之爲利

人也得惡者莫不糜之齒牙爲害身也鳥獸
昆蟲猶以名聲見異况夫吉士之與凶人乎

魏德論謳

穀

於穆聖皇仁暢惠渥辭獻減膳以服鰥獨和
氣致祥時雨洒沃野草萌芽變化嘉穀

禾

猗猗嘉禾惟穀之精其洪盈箱協穗殊莖昔
生周朝今植魏庭獻之朝堂以照祖靈

鵲

鵲之疆疆詩人取喻今存聖世呈質見素飢
食若華渴飲清露異於儔疋衆鳥是驚

鳩

班班者鳩爰素其質昔翔殷邦今爲魏出朱
目丹趾靈姿詭類載飛載鳴彰我皇懿

髑髏說

曹子遊乎陂塘之濱步乎蓁穢之藪蕭條潛
虛經幽踐阻顧見髑髏塊然獨居於是伏軾

而問之曰子將結纓首劔殉國君乎將被堅
執銳斃三軍乎將嬰茲固命疾隕傾乎將壽
終數極歸幽冥乎叩遺骸而嘆息哀白骨之
無靈慕嚴周之適楚儻託夢以通情於是佯
若有來悅若有存影見容隱厲聲而言曰子
何國之君子乎旣往輿駕聞其枯朽不惜咳
唾之音而慰以若言子則辯於辭矣然未達
幽冥之情死生之設也夫死之爲言歸也歸
也者歸於道也道也者身以無形爲主故能

與化推移陰陽不能更四時不能虧是故洞
於纖微之域通於恍惚之庭望之不見其象
聽之不聞其聲挹之不充注之不盈吹之不
凋噓之不榮激之不流凝之不停寥落冥漠
與道相拘偃然長寢樂莫是踰曹子曰予將
請之上帝求諸神靈使司命輟籍反子骸形
於是髑髏長呻廓然歎曰甚矣何子之難語
也太素氏不仁勞我以形苦我以生今也幸
變而之死是反吾真也何子之好勞而我之

好逸乎予將歸於太虛於是言卒響絕神光
 霧除顧將旋軫乃命僕夫拂以玄塵覆以縞
 巾爰將藏彼路濱覆以丹土翳以綠榛夫存
 亡之異世乃宣尼之所陳何神憑之虛對云
 死生之必均

曹子建集卷第十終



曹集疑字音釋

攙 切仕街	楸 切且留	菌 切奇隕	萑 切齒改	沆 切何黨	瀏 切力周	瀣 切余掌漾	鑄 切呼規
鷄 切知括	挂 切古賣	楷 切戶	菘 切直息	漉 切乎代	濺 切作廉	溜 切力救	鑣 切彼苗
鷄 切晏	搦 切女卓	欐 切力底	藿 切公換	蔓 切夔	涔 切仕林	淥 切力木	淦 切古暗
鷓 切公覓	搶 切初夷	菽 切息公	葆 切補道	薨 切眉耕	灑 切任角	澱 切戢	滉 切古廣

鷓

肅

鷓

霜

鷓

子奇

鞞

甲密

鞞

禹鬼

皦

于劫

眈

於阮

皓

浩

睽

力代

臍

子選

侍

直理

僂

籀文

銜

下監

往

圭

軼

苦敢

輻

如之

咄

丁骨

喙

子夜

黏

女廉

礪

洛罪

硯

口罪

崑

宜咸

崑

即巖

嶷

魚其魚

醒

陳貞

呆

縛謀

且

子邪

鮐

它才

蟀

步項

熹

許記

羆

救朱

颶

楚飢

恠

去劫

焱

卑遙

焱

遥二

耀

曜

熠

以立

爰

殊

𪔐

苦豆

穀

胡木

璫

七罪

珥

仁志

媯

湯卧

疥

耻忍

齒

襯

鰲

黎

駮

胡楷

閔

五載

盜

所加所

靨

於協

音釋終

大南集卷



